


A Monthly Christian Magazine

AN ORGAN OF THE ZOU PRESBYTERIAN CHURCH SYNOD

Khristian Tangkou

Vol. 56 || No. 9

September 2020



Editor: Rev. Khamchinkhai

Synod Kumpuon:

Thukhenna dih leh dihtatna khu tui bang in luong hen (Amos 5:24)

Khristian Tangkou

Vol. No. 56 || Issue No. 09 || September, 2020

Editorial Board

Editor : Rev. Khamchinkhai - 8730933744
Joint Editor : Rev. Dr. Hangpi Maunlun - 9862910875
Cir. Manager : Upa Jamsianmung - 9862086615
Bus. Manager : Upa Kamgenpau - 8974612937

Ms. Niangkhanmang
Miss Tracy Niangsuannuam

Cont. Editors : Upa Khupsuankham - 9856406454
Rev. Awnkhankhup - 9862828921
Rev. Thangboi Khuongsai - 8119957887
Rev. Khamminlian - 8414998542
Rev. P. Ginzalal - 8131814376
Upa Dr. M. Lachinkhai
Upa Jamgenthang
Upa M. Lianminthang

ZOU SYNOD ULIENTE

- **Moderator:**
Rev. Zamlianpau
- **Moderator Elect:**
Rev. Kapsuanthang
- **Secretary (Sr):**
Upa Kapkhanthang
- **Secretary (Jr):**
Upa M. Kamzadou
- **Treasurer:**
Upa M. Sianzahau
- **Statistician:**
Upa Shanti Kumar
- **Executive Secretaries:**
Rev. Khamchinkhai
Rev. Dr. Hangpi Manlun

Copies - 1200

AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

A sung thu

- Editorial..... 01
- Thu tuomtuom & Thumpi ding 02
- Danglam ngam Gingtu hinkhuo 03
- Hattuum kizilsahna dihoute..... 08
- Pasian hina leh a minte 12
- Hagau baptisma 16
- Mission Column 21
- Upa Suunna 23
- ZPWF Column 24

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



Editorial

Awle u-le-naute Pasion mapuina toh tukum haget mangzouin September hatan a hing puitu i biech Pasion min i phat masa uhi. Tualeh, kum chin a i manbangun September ha pen sepguol ha, ahi a mun khen khat adiehin khopi sungte ah i covid-19, ziehin i gam solkal thupieh bangin nidang bangin biehin kai amaw, ahisih leh inn chin tuon a group a kizui a inn vena/tawtnate ineithe sih ua a da um mama hi. Ahin, a hatuom liengin vahthei sih lei zong mimalin eiman kul-le-poimaw i sahnate uah i kalsuon thei uhi.

Tualeh, sepguol poimawna ahileh kum khat sungin crusade, camp leh seminerte nei thei lei zong tami Sepguol ha ahileh local lieng a hagaulam a halthanate i tantheina ding ua, alawmpi a hagau a i kivetheina uh hum lemtang ahizehin in apoimaw mama hi. Tuaziehin, sepguol nei hun sung in a loutheilou ahisih nahleh Local, District, presbytery leh synod liengte ah zong vaiguon lien leh thupite zong i bawl ngai sih uhi. Tuabanah, tami sepguol vaiguon ziehin hagau lam a hatlou leh basam tamtahn Pasion muthana, kisiemthana leh pan lahthanate zong i tanlaw leng uhi.

Tuabanah, i thu puosah bang un sepguol sung a i sum mute uh zong khawl a i Synod lieng a ‘income generating’ sum-le-pai mutheina ding a project a ding in i koi ua, tunua kum bangzat e khat chieng a, muthei a sil khat bawl ding khu zong i sepding ua i koi khat uh ahi. A bangbang hileh zong mani local committee lemsahna bang a, vaiguon inei ua amanpha thei pen a mang a tahsa-le-hagau a i khanpi theina ding un Mangpa Pasion in hattuom chinte hingma puiin umpi chietta hen aw.

Thv tuomtuom leh Thumpi dingte



- # Pasion lungsietna tang in khovel buoina kawmkal ah Covid-19 vei kivbelap zel nanleh, tam natna bei thei abahlou ziehin Phuolpi Vaihawmten zong khovel economics buoilou a peipi ding chi ahi toh kityuoh in Unlock-4 pat ahita a, tu September 21, 2020 apat Biehinn kai thei ding a i umtah zieh un ahing mapuitu Pasion min i phat uhi. Tambang kawmkal ah Hattuumten pilvang kawm a kal suon in tam natna pungsaktu hilou a a kiem theina ding in sil bangkim siem i asaian kung ah thum kawm va ui.
- # Synod leh ZPYF-te pangkhawm a i Synod a ding a sum-le-pai mu theina leh khang sawn momnoute khuolna a, High School khat nei ding kisawm lel ahi. Tualeh amun ding in Emmanuel khopi sah ahia, tuanah local lieng a tuoh ding a i bituh, Presbyterian Church of India, Awnchinkap khuo ten Rs. 30,000/- (Sing thum) ang tuohta ua, amau ahileh local lieng a pe masapente ahi uhi. Local dangten zong ngaituo siem a pe chiet dig in i kingne uhi.
- # Covid-19 kawmkal ah District, Presbytery leh Synod lieng a vaiguon i neite uh lawchingtah a i zah tou theina ding un bangkim bawl thei Pasion kung ah thum zel va ui.
- # I thei chiet sa bang un tulai leitung in a buoipi Pul Natna (Covid-19) bei thei nailou ahina ah ei Gingtute in bangkim bawl thei Pasion kung ah thum in tam natna a kiven ding dan Government in dan a bawlte zui a kiveng chiet ding in i kichiel uhi. Tu bang a a apei zelleh India in Covid natna nei tampente lah a, a nina luotou pai ding dinmun in um hi.
- # Leitung gam kituna nasatah um in India leh China zong nasatah in Ladakh kitu in buoi mama ahiziehin, a dieh in ei sung apat Sepai pangte a ding in Pasion kung ah thumpi zing va ui.

DANGLAM NGAM GINGTU HINKHUA

Rev Dr. Kh. Khaizakham

1). Thumapui. Good Friday leh Easter mang dinga April 13,2017 ni a Kohima zuon a ka pei lai in whatsapp group khat ah tam message “Emi singnuoimi (UG) khat top ut mama, lah topthei talou, nikhat laihah aguh a giel in, “HAT LOU A HINGPANG KAH I IN, SAWLLOU IN KA KINUALE TA... lamkaipu, bye” chin nuasie ana dap pei hi. Koi ahiei khat in chiemmui na dan a ahing giel hi maithei ahi. Hinanleh tami’n ngaituona khat ka lungsim ah ahing kilang sah a, eite gending khu “Mang Jesu, nang hing hatna dawng a hingzui kahi a, na hing nua sawlkia loungal leh hing nuasie sih vang” chi hi leh. Gin um a Mang Jesu nuazuite khu danglam teitei ding ahi. Kum 2016, October ha in Mumbai ah EBC leh ZCF kigawm in camp guntah a guonggal uhi. Mumbai leh Pune kikal a singtang khonuom tah Khandala ah kaki camp uhi. Catholic te retreat centre nuomtah mai ahi.

Tam camp ah Mumbai khopi sung a umte mai hilou in, Campi thupi ana thei a lunglut mama a, amau a dinga Pasian in gennuom nei hi ngeiva chia England, Qatar, Mauritius leh Andaman gamte apat a hing pang zong a um hi. Campi sung ah Pasian houpina tang in kipahtu ahing genchiet uhi. Sum tampi seng a hingpang ahi ua, a sum sen uh kithaman sa chiet in akile kia uhi. Ka gen nuom khu tam Camp thupi khu poimaw kasa mama a, tam thupi zang a tam article hing giel ka hi. Camp thupi khu (Sap

ham) mangkang ham in ‘DARE TO BE DIFFERENT’ ahi. Tam thupi mama khu February 9-12, 2017 sung Delhi EOC khanglai Camp azong thupi in aki zang kia hi. Khopi a khawsa khanglaite’n Mang Jesu ading a hinkhuo danglam bik, piengtha tan mai a lungkimlou a khovel mitmu ngei a hinkhuo tuom leh danglam zah a ut dan uh kamu a, lungdam a um mama hi.

Camp hun sung a ka na ha gen khu Sadrak, Meshak leh Abednego te apat chouna thu ahi deu hi. Tulai in um hile uh tam

lawmta mithum te leh Daniel in Pasian min toisang mama ding uhi. Tam article ah lawmta thumte kahing tahlang deu hi. Amauh te khu amauh hun a dinga ana hing ahi ua, eite ahileh eihun (tu hun) a ding a hing ihi uh chi ngaituo tha va ui.

2). Tangval thumte apat muthei hinkhuo khu. Khovel toh kilemlou a, Pasian zaudan siemtah a hinkhuo zah ding chi ahi. ‘Milim mai a va kun zuol mai mai a, I lungsim a igintat sih pou leh khawh sih, chi maimai mi ahi sih uhi. Milim mai a kunlou ding khu a ngaituona uh ahi mai hi. Pasian in a hunkhe thei chi a muongngam ua, hinanleh a ginna det zaw khu “A hing hundam lou ding hinanleh na milim bawl mai ah kuun sih vang” chi ahi mai hi. Lengpa thupieh va nial mai khu saltang mithum te leh lengpa khu a dinmun uh akibahlou lou majen toh maw! Hinanleh tam lawmta thum te’n leng thupitah sangin amah tunglam peh ah lei leh van siemtu Pasian khu a mu zing uhi. I mai a ding zing melmate sangin i tunglam a hing en zing Pasian mu zing khu galjawna bulpi ana hi leng hi.

Kilepsan lou a ginum tah a abieh zing uh Pasian in a manghil vawtsih hi. Lengpa thangpai

mama in meiphuolpi ale sagi a sasah ding in thu apie a, tua sung a selut ding ahi ta uhi. A mei a sat mama zieh in a seplutte zong a hullum hi. Hinanleh meiphuolpi bang chibang a sa ahiei chi a thupi sih a, meiphuolpi sung ah koi in a umpi ei chi a thupi jaw hi. Meiphuolpi sung ah a puonmong uh hiin, a samzang khat uh zong akang votsih hi. Lamdang tah in mi thum khu mikhat in ahing belap a, lungmuongtah in meiphuolpi sung ah a vahkhawm uhi. Lengpa’n zong amu a, “a li napa melpuoh khu Pasian a bang hi” achi hi. (Danial 3:25).

Aw khai, ginum a ei zong i panzing pouleh a lina a pang Mangpa’n hing umpi zing ding ahi. Bible siemte sutdan in meiphuolpi sung a hing umpitu khu Mang Jesu (Pre-incarnate Christ) ahi chi uhi. Ngaituo vawi, tangval ginum thum Ama min a meiphuolpi sung a kisp lutte khu van apat a hing peisuh vengveng in ahing umpi hi. Mangpa lungtang sukha a akipiehma un a bieh uh Mangpa khu a hankhie mai uhi. Mit a muthei a Mangpa akung ua ahing um mai khu thupi na va-ia e! Gin um tah a migam a ava umna uh khu a missionary nasepna uh thupipen ahing suohta hi. Lengpa’n tuabang a meikuong in bangma alaw zoulou dan leh

umpitu a neidan uh a mu in tam tangval ginum thumte Pasian khu gingta (believe) hi ding ahi.

Lengpa thupuon khu thupi hilou amah? Missionary nasepna thu tampi isim ta ua, tambang , a um nai sih hi. “Tuaziehin thupieh ka bawl ahi, michin, namchin leh ham chin ami koipou Shadrak, Meshak leh Abednego Pasian tunga thu hoilou gen pouma satnen in a um ding a, a innte uh vutvam asuoh ding hi, a zieh pen tambang hundoh thei Pasian dang a umsih hi,” a chi hi (Danial 3:29).

3). Nebukadnezar in a gamsung Babulon gam ah a kaisang sah ta hi. Ginum a Pasian bie a, khawvel bawldanzui mai lou a, danglam ngam tangval thumte apat Pasian deidan hinkhuo khu imu tahi. Tulai hun in amaute apat bangchi kalsuon ding ihiei chi zilkhiet bang inei tai chia ki ngaituo tham ching ahi. Tuhun a zong amai a kunchiet ve, kun mai ding hilou amah., chi ngaidan a tam mama hi. Tulai mite tampi a kun na uh tamte ahipen hi.

Sum-le pai mai a kunna : Gawlguh, nehguh chite a petu leh a latu akibang ahi. Sum a kipahna sui aki tam mama tahi. Laisimte thumsah ding dan tambang hileh ahoi diei; “Aw Pasian, nang ding

in ginum zing ka ut a, ka lekha simna hing panpi in, siemna hing pie’nlen, sepna mawngmawng sum a leilou a ka gielkhiet zaw teitei theina ding in hing panpi in” chiin theitop suo in lekha simlei Pasian in hing dawng ding ahi chi ginglel sih vai.

Tam atung a igen khu a bullam suhdih ding a um hi. Chiindan dihloou mawmawng zanglou a lekha simna a ginumna leh dihtatna peipi ding manghillou ding ahi. Pasian in ahing guoljawlthei nading a kukal tah a lekha sim ding ahi. Lawm leh gual toh kithuo manlou zen a lekhasimte miphalou tam sih va. Laisiem leh officer masa khat in simlaite a hasotna ah, “Ka shi leh ka shi chiin lekha sim un, tuahileh shi zoudeu lou ding na hi ua, hun giap pan ding ahi” achi hi. Khanglaite ding a hasotna poimaw tah kana genzel khu “Mi lawchingte khu lenlai chaan ngam a khonung ding kibawlte ahi uhi.” Ahi mawng ahi. Mi lawchingte va houlimpi lechin ‘short cut’ zui um lou ding hi. Lamtou sau tahtah hing zui tung te ahi uhi.

Mite’n zong bawl hiven chia a hoilou theizing pum a silbawlte khu a silbawl un lawchinna lampi a khah sah hi. Nungah leh tangval- a buoi bai taseng te mi lawching a tam sih

hi. Tup kichiantah nei a i tunna ding uh tun masang a lawmngai a kisuhbuoi lou ahoipen ahi. Kitahla bai sengte khu tunna ding tungzou umlou uhi. Kingaina thanghuoi diehdieh khu melma thupitah ahi. Na tunua nopsah na ding zousie baitah a sex maitam a na latkhiet leh na kisia vangin na bawl dih thei tasih ding hi. Gitlouna Pasion in a ngaidam thei a, hinanleh gitlouna'n tahsa a suhsiet te khu mawh bawltha thei ahi sih hi.

Zu leh sa leh khamthei bang hizong leh chiem (taste) lou ding a kithunun te khu mi muonhuoi/suonhuoi ahi uhi. A khanglai hinkhua a zu-le-sa chiem khalou a kisia mama koima akimu sih. Zu-le-sa a naki buol a tawpsan theilou a kisia vangut vang mu ding a tam mama hi. Mipil leh kithunun te khu kuva, zatep, tuibuh, khaini, talab chite ah koima akisubua sih hi. Poimaw lou a sum senna mai hilou in, tam silbuate in ahing puohkhiet natna chikim i maituo zing hi. A poimaw pen khu tam silbuate apat a kikem siengthou zouloute khu a gingu hinkhuo ah zong chitlouna lientah nei ahi zing hi. Etton tahlou hinkhua khu hinkhua pamai ahi.

Mit a mu ut sil kidah huoi tamtah, khanglaite puimang leh hinkhuo buatah a pulut thei tulai/ tuhun in a tam hi. Blue film ana kichi zel film thanghuoi, numei pasal thanghuoi tah a kipawl na ahing tun masah lai in, a um hi chi kithei nanleh et tei vasomlou te khun aki mu dieh sih hi. Hinanleh tu in i cell phone apat mu zing thei ahita. Khamthei suoh a saltang a tam bang in tulai in 'internet pornography' a saltang a tam hi. Tuabang milim bua tahtah te et zieh in tulai in huasanna leh thanghuoina a huoise mama hi. Naupang kum chinglou nangawn pawngsuolna, nungah-le-nungah ki deigaw, Pasal-le-Pasal kingai chi te, nidang a athu maijong ina thei khahlou te tu in igamsung uh a hing tungta hi.

David in Bathsheba guohtang a kisil amu khu live porn ahia, tomkhat sung a et in a lungsim ah angkhawmna ahing lut a, azi hiloupi a innsung a hanlut in a khelpi ta hi. A kisiana nat dan khu Late (Psalms) ah aki mu tam mama hi. Tambang a Pasion kipahna David khu, manghil ngailou ding tanchin hoilou tah, mi zi toh a lupkhawmna thu tuni tan in genzing in a um hi. Hei a hing kipan ahiei chia isut leh a mit a guohtang a kisil amu zieh ahi.

Numei guohtang a kisil koima'n nichin in mu sih va. Hinanleh nang a khawhzo na phone ah na mutthei zing hi. *Na Khristian hinkhua a dindet zing na ut a, danglam tuam khanglai hinkhuo na zah ut leh na cellphone ana laan siengthou in.*

4). Na hun awng zousie silpha in sudim in. Laibu gieltu khat in, “mi thada/thasie ngaituona khu setan workshop ahi” ana chi a, a gendih mama hi. Nang matang a hun awng nanei tam tahluat leh setan in hun lemtang mu zing ding ahi. Silhoi in kisubuo i zing in. Hun awl na nei taphot silhoi bawl na'n zang in. Loi-le-guol khat panpi in. Insung na poimaw khat vabol mai in. A poimaw pen khu, na Bible simna ah hun na zah thei zaza, atam theipen zangin. Laibu hoi khat kilei inlen, kal khat na hun awl sung in simsuoh som in. Laibu hoi a tam theipen lei som in. Silhoi bawlding ngaituo lou a hun awl mawh zah te'n Mangpa deilou lam bang ahiei ahing bawldoh zel uhi.

5). Nichin in Mang Jesu toh zawhkhawm dan zil in. Hagau Siengthou puina ngaina zingin

kalsuon in, Hagau Siengthou sulungkham sin. Ama tenna biehinna na hita ngal hi. Ngaituo vawi, Pasian hilhiel nang a ahing um mai khu Nichin puitu ding a hing luotu Hagau Siengthou ahi. Na pientha ni apat a hing puitu ding a nang hing luotu ahi. Ama ngaisahlou a, a aw zong na kitheimawbawl leh Hagau akipah ngai sih ding a, tuahun chieng in kipahna mawngmawng na nei nonsih ding hi. Pasian Hagau Siengthou hilhial in ahing tenkhum ana hi va-ia hi. Eima hatna toh khovel a kalsuon zoulou ding ihi thei in Mangpa'n Hagau Siengthou khu puitu ding in ahing pie hi.

Gending tampi um nalai va. Hinanleh danglam tuom ngam hinkhuo zahna ding in atung a thu poimaw mama te manghil lou in kalsuon lei i loi-le-pai lah ah leh i tenna mun taphot ah mite'n ei ah danglamna khu hing mu va uh. Danglam ngam gingtu hiding in Mangpa'n hing umpi zing ta hen.

(Note: Tami article khu Rev. Dr. (Kh) Khaizakham in ZPYF Diamond Jubilee Souvenir a, a gel kisuo sawn ahi).

HATTUOM KIZILSAHNA DIH-LE-DIHLROUTE UM DAN LEH A PICHING HATTUOM UMDAN

Rev. Dr. Hangpi Manlun

1). Thumapui. “Tuabangma in, lungsietna a thutah gen in Ama, a lutang, Khrist ngel ah khun bangteng ah ang khanglienta diing uhi” (Ephesate 4:15)

Leitung pumpi gen tah lou, ei Manipur maimai ah zong Khristian leh Pasian hing bie kichite lah ah zong kizilsahna (doctrine) dih-le-dihlou atamta mama hi. Ahin, koiman kou a, adihsih chinah sangin, eima umna hattuum chiet uh khu a dihpén leh hoipen in i ngai un, i pom ua, akhente ngelin lah amau pawlpi/hattuum ua umkhaloute khu van gam lut lou ding bang phiel a ngaidan nei in, mi hattuum leh pawlte bang dem in, kisubuoi leng uhi. Tualeh, hattuum sung ah khun Khristian tahtah leh a khem/lem a um chi i thei chiet ua, ahileh a hattuum/pawl ah zong, Hattuum pawl kizilsah dan dih-le-dih lou zong a um ngei hi. Bible thu leh leitung a i mu dante hoitahin sut talei, Khristian khem/lem a um thei bangin, Hattuum khem/lem zong a umthei ngei ding chi alang hi. Ahinlah, i Hattuum etkol

leh umna uh khu atah amaw, ahisih leh akhem/alem banah i kizilsahnate uh zong Bible toh a kituohnai chite bang i theichet ding uhi. Tuaziehin, Hattuum dihtah leh akhemte umdante leh a kilahdante uh i sui ding uhi.

2). Hattuum dih-le-dihlou kilahdante. Mi khenkhatte khun hattuum dih-le-dihlou umzie zong theichien louin, “Hattuum zousie a kibang leh ahoi chiet hi-va” chi ngaidan bang anei uhi. Ahin, thugin khu hattuum kingahna bulpi poimaw tah ahi lam zong angaituo ngai sih uhi. Mihingte khu a thugin pom bang un ahing ua, a silbawl uah a langkhie leng hi. Tuaziehin, hattuum dih khu a thugin uah a kimu in a langthei ding hi. Ahin, mimal tahin Pasian toh i kizopna hoi in dih nan leh zong, i umna hattuum kipuoh dan/kivaihawmdan leh kietkoldante a

dihsih leh i khanding bang tah un i khangun, i piching thei tahtah sih ding uhi. Hattuum dih-le-dih lou thei khietnate khu tam a nuoi ate ah a kilang ding uhi. Tuате i sui ding uhi:

2.i). Hattuum dihloute khun hundam hina/tan na ding in Jesu sangin sildang a gen uong gen zaw uhi. Hattuum/zilsahna dih lou khun hundam hina ding in, Mangpa Jesu sangin sildang, adieh in amauh pawlte peidan, gin dante leh a kivaihawm dante a gen uong zaw leng uhi. Ahin, hattuum dihte thugin khun atangpi-in Mangpa Jesu ah akinga hi. Tuachin, hattuum dih in, Hundamna khu Mangpa Jesu Khrist gintatna zieh leh a lungsietna a hundamna tan ding ahi achi uhi. Ama-un, Jesu Khrist khu ginna toh hundampa ding in apom ua, tuachin, Ama a ding in theitawp suo in a kipie uhi. Amabou, gintatna tungtawn a hundam ang hitah chieng un zong, Ama (Jesu) a dingin, hin ding leh bawl ding atam mama a, bang lamlam-ah zong thuhil leh puihuoi angai uh achi uhi. Tuaziehin, athugin leh Pasian thu a gendan zousie u'khu Mangpa Jesu zilsahna ah a kinga a, tami leitung a Guolnei/zawlnei kichite

thupuan amaw, dan bawltawmte thugin in a buoi sih uhi.

Hattuum dih loute vangin, Jesu Khrist khu hundamtu ahidan gensam nan leuh zong, hundam tanna ding in sil poimaw dang a zeptel leng zel uhi. Tuabang, hattuumte khun “Jesu khu hundampa” a hi chiin gen nan leuh zong, Jesu sang a gen poimaw zawh dang a amauh hattuum bawldante, dan-le-dun a zuite uh a zeptel zelzel uhi. Tuaziehin, zilsahna dihloute khun Mangpa Jesu sang in gen uong zawh anei na uah a lang chieng mai hi. Amin a Khristian ahiziehun, Jesu min zong a gingta akichi thouna ua, ahin Jesu sangin a lamkaite uh amaw, a zilsahna uh thute amaw, a gen lang tam zaw leng uhi. Tambang a, a uong genna lam uah a lungsim uh leh ngaituonate a seng nasa mama ua, amauh gen lou lam a pangte khu dihlou-le-hoi louin a pom uhi. Tambang, a gen uong na lam uah a lungsim nasan uh neu gopin, tuakhun, Pasian thu a pomdan uh kawchih sah in, thamlouin, a sil theidante uh leh a hinkhuo tanpha uh zong a neu in a kawchih gawp uhi.

Tua bang ahi ziehin, hundamna khu apawl uah amehmat ua, amau pawlte

maimai hundam hidingin agen uhi. Leitung ah tuachi bang pawl tuomtuom atam mama ua; tuaziehin, hundam hina ding a Jesu Khrist gintat kan a poimaw azetel uh atam mama uhi. Tambang, ngaidan leh pomdan neite khu hattuom dihloute umdan ahitangpi uhi. Tuaziehin, thugin dihlou khu hattuom dihlou ahingal ua, hattuom dihlou a um khu Khristian dihlou hina zong ahimai hi.

2.ii.) A Nnasep dan uah alang hi. Hattuom dih in Khrist a dingin, theitawpsuo in nna asem ua, Khrist a ding bou in phatuom angai zing uhi. Pasian thu a genna zousie uah, amau hattuom tahsalam a suhpun/member punsah sawm sangin, miten Khrist amu ua, a pomtheina ding un thu a gen leng uhi. Tami umzie ahileh hagau mangthai mat leh buoipi zing ahidan uh genna ahi. A langkhat lam ah mani pawl punna ding a, midang gingtu hisate chiel/zawlte umdan demna zong ahi hi. Tambang a, Khrist a ding a phatuom ngaitah a semte khu hattuom ah a umkhawm ua, a sephawm dan uah zong Khrist a ding a sephawmna un ma apui zing ua, annasepna ua piengthate khu hattuom ah gin umtah a um

ding in apui lut uhi.

Tualeh, Hattuom dihloute in vang, Khrist a ding a sem/ bawl kichi kawm in amauh pawl uh suhpung sawm in midangte demin nna asem leng ua, mite Jesu Khrist kung a pui sangin, amauh hattuom suhpung na dingin Pasian hattuom/gingtute asubuoileng uhi. Tambang, hattuom a umte khu pawl lungtang ahanei sengseng ziehun, a silngaituo dan uh zong a kawchin in aneu a, alungsimte uh zong a neu mama a, alawm a guolte lah uah zong a danglam dieh uhi. Tuaban ah, pawldangten hoitah a, a nna sep piching sate zong khu suhbuoi sawm in ang kigol zel uhi. Tambang, mite khun Khrist min suongin Pasian poi akhoi nasa mama uhi.

2.iii.) Asil ngai poimawte uah. Hattuom dihten a angai poimaw pen u'khu Mangpa Jesu Khrist deibang lungtang puoh leh khantanhoi toh kituoh a hin zing ding ahi. Bang chi bang hattuom hinanleh zong pawl lungtang neu noute puolouin, Mangpa Jesu ah pumkhat i hidan lamthei in, sil a bawlkhawm thei uhi. Gingtute dinga poimaw asah pen uh khu, Khrist deilam lungput leh adeilam hinkhuo zah ahi a, khum

bangte thuhilna ding in akizang sieng pen uhi. Tami pang lou in, pulam dan leh sil hoi dangte zong khu hoi buching tahtah thei ding a um sih hi. Innsung leh midangte lah a, i nnasep leh sil bawl taphot ah, Khrist lungsim toh kilem zel a um leh bawl khu poimaw asa pen un, amaute azilsah pen uh ahi.

Hattuom dih loute in vang amau hattuom deidante khu Mangpa Khrist deilam amaw a chi uhi. Mangpa Jesu zilsahna sangin, amauh pawl zilsahna kawchitah mai khu angai poimaw jaw leng uhi. Pasion thu a gen chieng un zong atawplam ah amau pawlpi bawldan ah akikhumlut leng uhi. Tuabanah, Pasion nnasemtum angaisante uh zong Pasion thudih gente sangin, amau pawlpi peidan gen hoi leh gensiemte ahizaw leng uhi. Tam bang a hattuomte silngai poimaw khu Mangpa Jesun alungdampi in akipahpi ding a gintat um seng sih hi.

Tambang, hattuomte a nnasep dan u'leh asil bawl dante uh apumpiin enta lei, angai poimaw

u'khu, a hattuom/pawl bawl dan leh chindante suhlang zing ahi uh chi a lang mai hi. Khumte khu Khrist gintat bangin agen poimaw ua, tambang nnasepna khu Khrist deilam hipen a athei u'khu pulam sil leh achin dante uh ahi penmai hi.

Tuabanah, amaute khun midangte adieh a amauh kibahpi loute zong angaisih ua, midangte kung a um zong nuom asa sih ua, a thugen dan uh leh umdante uah ahina dihtah uh a kilang leng hi. Tamte banah, amauh angsung zong a khuolua, Hagau lam hamphatna zong midangte sang a tan zawh leh hagau mi a kilah zong a sawm leng uhi.

2.iv). Pankhawm dan ah. Hattuom dih a umte khun pawlpi lungtang in leitung/hattuom dangte a enseng sih ua, Khristiante lungsim in a en zaw uhi. A umna pawlte uh tuom nan leh u'zong, Khrist a ding in a sepdan uah lungsim mun khat apuo uhi. Tuachin, nnasepna uah zong a semkhawm siem mama uhi.

PASIAN HINA LEH A MINTE

Rev. Zamlianpau
Moderator, Zou Synod

1). Thumapui: Mihing huoh pilna leh siemna mai toh Pasian hina leh nnasepte suizou guol ahi sih hi. Ahivang in, Ama-le-Ama hing kilahnate/kihilna pansan in Pasian hina leh nnasepte, abiihtah in hundamna toh kisai sil kuul-le-poimawte a kithei thei hi. Tua bang Pasian kihilnate ah Pasian hina leh nnasepte bukim tah a tahlat sieng ahi sih hi (I Kor. 13:9-12). Tuaziehin, Pasian leh a thu suina ah mihingte bukimlouna a ensah a, mihing theina a suiphalou um ahi chi theisiem a poimaw hi. Tuaziehin, Laiseingthou sung a thu hasa khenkhat toh kisai leh Khristiante lam-et thugin a ginna poimaw dan, ginna lou a tuabang sil leh thute theichien zou hilou ahidan manghil lou ding ahi.

2). Pasian hina: Pasian khu khat, bangkim siemtu, bangkim kipatna leh tawpna, Alpha leh Omega ahi (Johan 1:1). Pasian hina bukimtaha thei leh hilchien khu sil hamsa mama ahi. **Azieh khu:**

2.i). Koima'n Pasian mit a mu um lou, tuaziehin mit a mu a um lou ziehin hilchien hamsa hi.

2.ii). Pasian bangkim siemtu ahia, mihingte silsiem ahi.

Tuaziehin, siemtu leh a silsiemte kikhanna lien mama ahiziehin silsiem (mihing) in ama siemtu (Pasian) theichien sipsep zoulou ding mong ahi. Pasian hina bukim taha theichien zou hilei, silsiem toh a kilamdang na

um lou ding a, ginna zong poimaw lou ding a, kingahna taahlou/chinglou suoh ding hi. Tuaziehin, Pasian hina leh anasepte theina umsun khu Laiseingthou apat leh Ama nasepte apat sui ahi. Pasian hina toh kisai Greek mipil Plato in “Pasian khu tangtawn lungsim, silhoi chinteng umsahtu” ahisah hi. Greek mipil Aristotle in “Pasian bang dang hilou in, sil tengteng kipat khietna (first gound of all thing)” ahisah hi. Tualeh, Duteh mipil Spinoza in ahileh “Pasian khu Vannuoi a sil um teng teng khaikhawmtu, Ama-le-Ama a um leh, sil dang tengteng piengsahtu” ana chi hi. German mipil Immanuel Kawt in “Pasian khu ama ut bangbang a sil tengteng umsahtu, thuneina

bukim nei, koima tung a phutlui mawpuohna (duty) neilou leh, khovel a silhoi umsaktu (Moral author of the World)” ana chi hi. Tam bang Pasian hina toh kisai pomdan tuomtuomte apan, Pasian khu Ama-le-Ama hing kilahna pansan lou a mihing pilna in suisuo zoulou ahi dan a kichien hi.

Tuaziehin, Lai siengthou a Pasian in Ama hina genna in “Kei khu kei ka hi (I am who I am)” a kichi hi (Exo. 3:14). Tam in agen nop khu Pasian a thupi zie bangma sildang toh teh thei guol ahilou ahina bukim tah suisuo leh theisuo zou guollou, hina chituom vilvel nei ahi china ahi.

3). PASIAN bukimtah ahina theiguollou hinanleh, Lai siengthou apat muthei Pasian hinate tam anei ate ahi.

3.i). Pasian khu Hagau ahi (Ezr. 20:4 toh 4:24). Pasian khu mihingte banga tasah pumpi nei, mit toh muthei leh khut a thamthei a hisih hi. 3.ii). Pasian khu kumtawn mi, kumtawn a um gige, umpat ni leh atawpni um lou ahi. Pasian khu a bawltu umlou, bang ama khat a pat a hing piengkhe zong hilou, Ama hing um khie, a kipatna leh zawna zong sui ding umlou china ahi. Tuaziehin. Pasian khu sil tengteng siemtu,

bangkim kipatna leh zawna, bangkim tunga thuneina lienpen leh vaihawmtu lienpen leh dihtah ahi (Jn. 1:3; Rev. 22:13). 3.iii). Pasian khu muthei hisihnanlei hing leh mihina nei, houpithe i leh hing houpi thei, kizoppi thei kothaina nei, deiteelna nei, sie leh pha khen chienna ban ah kipahna leh hepina nei thei ahi (Exo. 3:14; 6:2-4). Pasian khu mihingte theisiem theina ding a mit nei, kam nei, bil nei, khut leh keng nei bang a gen na zie khu atom a gen in, Pasian khu Hagau mi (Spiritual being), Ama a um (Self-existence) suizou guollou (Immence) leh kumtawn a um gige (eternally existed) ahiziehin ahi.

4). PASIAN MIHINATE:

Lai siengthou ah Pasian khu min tuomtuom in hat leh thei in a um hi. Mihing minte banglou in Pasian minte khu Ama hina leh nnasepte genkhietna ngen ahi. Mihing minte khu a phuotu in alungsim a avei leh duhthusam bang genna ahi a, Pasian minte khu Ama hina dihtah a thupina leh silbawltheina genkhietna ahi hi. Lai siengthou a kigen Pasian min tallaang deute tam anei a bang ahi.

4. 1).ELOHIM: Tami khu Hebrew ham ahi a, “Pasian”

china ahi. Abul a “EL” chi khu “Thahat” “Thupi” leh “Silbawlthei” china ahi. A thumal tawpna “Im” khu khat sang a tamzaw genna (plural) ahi a, Pasian khat a mithum (Trinity) genkhawmna min ahi (Gen. 1:1-4; 17:1; 35:11; Num. 23:22; Deut. 10:17). Hebrew Bible ah Pasian min “ELOHIM” a kizah chiengin Pasian khat a mithum genna ahi a, Pasian thupina, thahatna leh silbawlthiena zong ahi. Tuachin “EL” panna Pasian minte tam anei ate ahi.

4.2). El-Elyon: Pasian tungnungpen china ahi (Gen. 17:19; Deut. 4:2, 17). Pasian sanga tungnung zaw liengzaw leh sangzaw umlou china ahi. Pasian sanga bangma/koima muonhuoizaw beltham ching leh thahat/zauhuoizaw koima umlou china ahi.

4.3). El-Olam: Pasian kumtawn a um gige, kumtawn Pasian china ahi (Gen.21:33). Pasian khu a um pat ni leh abeini neilou, kumtawn a um gige ahina genna ahi ban ah, sil dangte kikhel zel nanleh Pasian kikhel ngailou puotha leh bawltha ngai ding um lou abukim mama genna ahi.

4.4). El-Elohe: Pasian Israelte Pasian china ahi. Israelte teeltu Pasian ahina Pasian leh Israel

nam toh kizopna genna zong ahi.

4.5). El-Shaddai: Pasian thupipen leh kiningching tahsap mawngmawng nei lou china ahi (Gen. 17:1-2; 49:24-25; Ruth 1:20-21). Pasian ah hoina, chitna, itna, theina leh adangdang kiningching taha um ahina genna ahi.

4.6). ADONAI: Tam zong khu Pasian min ma ahi. “Mangpa” china ahi”. Pasian bangkim tunga thunei leh vaihawmtu ahina suoh (Slave) leh apu (Master) kizopna genna min ahi (Ezr. 4:10, Vai. 6:15; 2 Sam. 7:18-20; Ps. 8:1; I Kor. 6:20; I Pet. 1:14-15).

4.7). JEHOVAH: Tam khu Pasian minte lah a kizang mun mama ‘Mangpa’ china ma ahi. Laisiengthou a Pasian minte leh a Thuhunlui a kizang tampen ahi a, 6823-vei vel kizang hi. Hebrew ten Pasian zatat huoi ahizieh un a min gen khie ngam mawhmawh lou in tuaziehin “YHWH” chi in a na gel uhi. Pasian min YHWH ah ging bawltu laimai (Vowel) umlou ahizieh in koiman simkhe theilou ahi. A khonung in simkhiet thei dingin laimai ging bawltu (vowel) “a” leh “e” hing bul ua, “YAHWEH” chi hing suoh a “JEHOVAH” zong akichi hi. Tam Pasian min in a gen nop khu Pasian “Kumtawn a kiheng

ngailou leh um gige Pa” china ahi (Late 102:27; Exo. 3:14; 15:2,5’ Eph. 4:23).

4). Tualeh, Jehovah apat Pasian min dang tampi te tam anei a te ahi.

4.i). Jehovah; Jireh: Mangpa’n poimaw leh tahsapte hing petu china ahi. (Gen. 22:7-14). Mihing in a bawltheilou, huipi, guopi, meipi, hunbite annte, louhing leh chidamna hing petu Pasian ahidan genna ahi.

4.ii). Jehovah - napha: “Mangpa sudamtu” china ahi (Exo. 15:26). Pasian khu tahsa damna mai hilou in Hagau natna apan damna petu ahi.

4.iii). Jehovah - nissi: Mangpa ka puonlap/diellap (flag) china ahi. Pasian khu melma /gal setan leh a vanzatte, nnasep zauhuoi zousie lah apat hum bittu, guoljawlna hing petu ahidan genna ahi (Exo. 17:15).

4.iv). Jehovah shalom: Mangpa muonna, lungnopna pietu china ahi (Vai. 6:24). Kim leh pam hasat leh thoveng a kinga hilou, bangkim tun a vaihawm leh thunei lienpen Pasian ahina, silbangkim anuom leh hamsa theisiemna leh puoh siemna pietu ahidan genna ahi.

4.v). Jehovah - tsidkenu: Mangpa i dihtatna uh ahi china ahi (Jer. 23:5,6), Khelna zieh a mihing koima Pasian masang a dihtat umlou hinanleh itna zieh a Pasian in mihingte Jesu Khrist tungtawn a dihtat a hing pomna genna zong ahi (I Kor. 1:30).

4.vi). Jehovah - m’Kaddesh: Mangpa’n a susiengthou china ahi (Lev. 20:7,8). Mikhiel leh kihdahhuoi mihingte, itna zieh a Jesu Khrist sisan a khelnate hing sawpsiengthou sah ahidan genna ahi (I Kor. 1:30).

4.vii). Jehovah - rohi: Mangpa hing chingpa china ahi (Late 23:1). Pasian khu a mite chingtu leh humbittu ahina genna ahi.

4.viii). Jehovah - Shammah: Mangpa munteng a um china ahi (Zek. 48:35). Pasian in theiphah louna gam leh umlouna mun neilou, hun chin a mun chin a um ahidan genna ahi (Late. 139:1-24).

4.ix). Jehovah - Saboath: Pasian mihonpite Pasian china ahi (Isa. 6:3). Tam min khu Pasian thuneina bukim tawitu, van mipi leh galkaphonte tunga thunei leh vaihawmtu ahidan genna ahi. Bang zatah in leitung kumpite hat in, Sakol leh Kangtalaite hau in, galvan bukim nei nanleh uh,

khumte tunga vaihawmtu Pasian ahidan genna ahi (Late 33:6).

5). A khumsinna: Pasian min tuomttuomte, Ama hina leh nnasepte genkhietna ahiziehin pilvang leh umzienei tah a zat

ding ahi. Lungkham hun, tahsap hun, thawmhau hun leh kingaiset hunban ah, lawchin hun, nieng leh tai hun, kisathei leh midangte simmaw khah hunte ah Pasian min tuomtuomte ngaituo tha zel ding ahi.

HAGAU BAPTISMA (BIBLE STUDY).

By- Upa Khupsuankham

1).Thumapui. Gingu khat hinkhuo a Hagau Siengthou nnasep dan kitheisiemlou pen khu “Hagau Siengthou baptisma” ahi. Mi khenkhat te’n Hagau Baptisma ipientha nua hun bangtan ahei zou chieng a gingu ten hagau lam vangphatna hatna leh hoina bang ahei khat amu uh genna ahi, achi ua, khenkhat in lah tam khu gingu khat in Mangpa Jesu a hundampa a apomlai tah a ama a Hagau Siengthou nnasepna kidangtah khu ahi, achi uhi.

Abang teng hitaleh zong tam pen Pasian thu in bang achi gen ei? Hagau lam a mihatte leh mi minthang khenkhatte gendan en vai:-

2). Baptistu Johan in (Mathiu 3:11) i etleh “kei vang in kisiana dingin tui in kang baptis a, Ama (Jesu) in Hagau Siengthou leh mei in noute ang baptis ding ahi” achi hi.

3). Mangpa Jesu’n ni sawtlou nuasang chieng a tung dingin achiem hi. Aman “Johan in tui a baptis a, hinanleh nouten vang ni sawtlou nuasang chiengin Hagau Siengthou in baptisma tang va uteh achi hi”. Tualeh tam khu (Nas. 2:1-4) pentecost niin atang tung ta chi imu hi. Gingu 120-ten Hagau baptisma atang ua, tualeh Hagau in adim ua, Peter thugen apat in mi 3000 in Mangpa Jesu hundampa in apom ua, hagau silpieh (Gift of the Holy Sprit) atang ta uhi (Nas.

2:3-7) ah imu uhi.

4). Sawltah Paul in Hagau baptisma thu ahilchien hi (I Kor. 12:13), ah aman azieh khu Judate hi in Gentelte hitaleh suoh hi in suohlou hitaleh, ibawn un sapumkhat a um dingin Hagau khat a baptis in i um uhi achi hi. Tamna pat in Hagau baptisma khu Hagau lam a halna leh hoina sanna leh silbawltheina bang ahiei khat pientha nua a tan ahisih a, pientha laitah a Hagau Siengthou in Khrist pumpi Hattuum a kahieng (member) khat a ang pansahna nnasep khu ahi, chi kichientah in ithei uhi.

5). Tapidaw mi minthang khenkhatten tam thu ana gendan uh en vai:

a) Scofiled, Bible minthang bawlte CI Scofield D.D. William Clubertson D.D. LL. D. Wilbur M. Smith D.D. Johan F. Walword A.M. Th. D leh a dangdang 5 ten (I Kor. 12:13) thu khu tambang in achi uhi, “Hagau Siengthou baptisma in shina apat a thoudoh leh patawi a um lutang Khrist toh gingtute akizopsah a tualeh ama uh zong khat-le-khat akizopsah uhi” achi hi. (WG Cliffe

hilchien bu peh 1244). Tualeh peh 1163 ah tambang in achi hi (Nas. 10) a Peter thugen zieh a Kornelia pientha apat tuni dong chiengin Hagau Siengthou khu Judate hi in Gentelte hileh Jesu gintat chieng a tan ahizing hi. Tualeh, Korneliate Hagau lam (Nas. 10:44) khu Jerusalem a gingu 120-te tan toh kibang ahi, chia Peterte thugen (Nas. 11:5-16) ah imu uhi. Gingu zousie khu Hagau a piengtha (Johan 3:5) Hagau tanchil (I Kor. 6:19, Hagau baptisma (I Kor.12:13)-tualeh Hagau a chiente (Eph. 1:13) ahi uhi. Thuhun tha in, gingu zousie in Hagau Siengthou anei thu leh Hagau Siengthou a dim thu atuom ahidan agen a, hagau baptisma khu khatvei chau ahi chi ahi.

b). Mathew Hudry hilchien bu peh 617: “Khristiante khu baptisma (hagau baptisma) ziehin Khrist pumpi ah member ang hi uhi. Hagau Baptisma in Khrist tahsa ah eite kahieng khat in ang pangsah hi. Khrist hagau nei taphot khu Judate hi in, Gentelte hitaleh Khrist a dinga kahiengte ahi uhi” achi hi.

c) Wgchiffee Bible Commentary in peh 1250 ah (IKor. 12:13) a hilchien na ah 'Hagau baptis hina toh kisai in siltung zousa gingu zousie tungtang adih (dan Korinth tanpha tung ah zong tungta, tung zelzel theilou) sih ahi.' Adihtah a gen in, Khrist toh hing kizopsah hagau baptisma khu hawl ding ahisih a, gingu zousie tunga tung zouta achi hi.

d). Tamte lou zong, Radia Bible class a thugentu te Dr. M.R. De Haan, Rechard De Haan leh Sword of the Lord Editor Dr. Curtis Hutson leh thugentu atul athen a zate pomdan ahi.

Tualeh Seminary President Pu Earnes Piekering DD in agel Hagau Siengthou tungtang kithumopna (Doctrine of the Holy Spirit) kichi laibu ah kichientah a muthei ahi. Mangpa'n athu guoljawlta hen, Amen.

GINDAN DIHLOU - TULAI KITHANG. THE EASTERN LIGHTNING CHURCH

1) Thumapui: Tulai igama hing kithang 'The Eastern Lightning Church' kichi

1991 kuma China gama numei Yang Xiangbin leh Zhao Wheisan kichi ten in ahing patdoh ahi, a kipat doh kum toh kisai gendan tuomtuom a um a,tutan in a hat mama ua China gam nuazui Million 4 vel nei ahi. China mediaten zong agam ua gindan dihloou zauhuoipen (Most dangerous Cult) chia a phuong uh ahi uhi. Ei lam a zong Nagaland a Baptist Churches kipawlkhawmte leh EBCC ten tami gindan dihloou apat pilvang ding leh kiveng ding in thusua ahing bawl ta uhi. I innveng Nagaland ten hichibang thusua abawlthei uleh eikung zong bit nonlou china ahita hi. Tualeh eimi zong ama uh group online fellowship atel a a gindan uh pom mama um chi zong thu akiza hi,a tahtah adiei chu akithei chien sih. Tulai khangthahte lunglutna whatsapp, youtube leh adangdang zanga misui ahi ua khanglaite lungsim zou mama ahi jieuh un athang ua i awh a i gindan apat puimang ihilou na ding un kikum khawm lei kachi hi.A pawlpi min uh "Eastern Lightning" khu Matt.24:27- Suolam ah tunphe ahing pheta tumlam dong asalvah bangin,Mihing

tapa hing peikia nazong tuabang ma ahi ding hi, chi apat alah uh ahi.

2)AGINDANUH(BELIEFS)

Tami gindan zuiten Jesu khu leitunga China numei in ahing peikiata a ama uh Pawl in “Almighty God” chin a biehi. (20, August, 2014). Tami nu pen “Lightning Deng” (The Guardian. 18, Aug, 2014. CNN 8, June, 2014, The New Yorker 19 Dec. 2012; The Telegraph 24 June 2002). China gam Henan Province ah ateng hi chi a gintat uh ahi. (SCMP 18 Dec. 2012; CFAR n.d.a) Tami pawlten Khrist numei in hunthah (New age) ah vai ahawm dinga mihingte thukhen pieh in gingtute chau a hing ding uhi (17 Dec. 2012),. Tualeh amanu pom louten shina huoisetah ahi louleh gawtna huoisetah tuoh ding uhi. (UCANEWS 20 Dec. 2012; SCMP 18 Dec. 2012, (UCANEWS 20 Dec. 2012) Pasian a mithum a pomsih ua, kumsang leenggam um ding pen a gen uhi. A lekhabu uh “The Word Appears in the Flesh”ah Bangkim Bawlthei Pasian numei ah ahing kilah dan a gelh uhi. Ama uten mihing khangthu khu Pasian

in Kum sangguh ading a guoltuh saha akoi in agen ua, hun thum in a khen uhi. Dan hun (Age of Law) - Pasian in Israelte akep/apui hun. Lungsietna hun (Age of Grace) - Pasian Jesu a hing pei ah mihingte a hundam hun, hinanleh a khielthei a hina uh beisah lou. Leenggam hun (Age of Kingdom) 1991 a kipan, tami hun a Pasian tuhuna ah ahing kilahna a, dihtatna leh nasep bukim a mihingte a khelna ua pat suotat sah ding. mailam hun a hing umding kumsang leenggam agen ua, tami hun ah Leitung khu lemna leh kipahna leenggam ahi ding hi. Mayante Thugenlawh (Prophecy) pansan in 21 December 2012, chia Leitung bei ding chin a tangkou ua (AFP 20 Dec. 2012; UCANEWS 20 Dec. 2012; FT 17 Dec. 2012) tami lemtang ah lah in nuazui ding suina in azang uhi (UCANEWS 20 Dec. 2012; Shanghaist 20 Dec. 2012). Hinanleh tutan in Leitung a abei naisih hi. The Financial Times in a gendan in “tami pawlte’n a memberte uh sum leh nei leh lamte pekhe ding in a thagum zang in anaw uhi.” (17 Dec. 2012) achi uhi.

3) A NASEPDAN UH (ACTIVITIES) Tami pawlte khu midang lahlut nading in a huham ua (CFAR n.d.a) a poimawh leh Thau (gun) zong a zang uhi.(The New York Times 19 Dec. 2012; SCMP 17 Dec. 2012). 2014 a China's People Daily in a suo dan in ama uh pawl a memberte Mi dang tampi ama uh pawl a kailut te ngaisang ahia, midangte zawlna in sum, silpieh, numei pasal kipawlana (sexual favour) te azang uhi. midang lalut temikhat a 20,000 yuan (\$3,237) pie ahi ua,ama uh pawl a lutsa a taidoh sawm a um leh gawtna mu ding ain a gi (threaten) uhi.

4) KIVAIHAWMDAN (ORGANIZATION) Sociologist Fenggang Yang, (Fenggang Yang is professor of sociology and founding director of the Center on Religion and Chinese Society at Purdue University in a gendan in Eastern Lightning te khu Hierarchical (a thuop a um/a lienpen apat ki guolsuh) ahi. Inspector kichiten gamkai a enkol ua, overseer kichiten tuolsung hattuumte a enkol

uhi. Lamkai leh tuolsunga lamkaite khu mamberten atel uh ahi. kalteng in inn ahilouleh community house te ah aki mukhawm ua, thumkhawm in bangkim bawlthei Pasian kilahna thute sim in a kikum khawm uhi.

5) NAGALAND A MEMBER 400 VEL UMTA - June, 26, 2020 a Dimapur pansan Newspaper Eastern Mirrior in "Tami CAG ten Nagaland ah munpi bawlsawm in social media tuomtuomte zangin pan nasatah in lah uhi" chin ana suo hi. Faith Harvest Church a Member Pito Kiba, tami pawlte ana suichien ahi. Eastern Mirror ah agen dan in Nagaland ah tami CAG te Nagaland a member 300-400 bang umta ding in agen hi, kumni bang Nagaland a member ding suina nei uh ahi jie in. Tami pawlten a tangpi in numei te leh khanglaite a member ding in zolnop sah uhi, ajieh ahileh numeite pen i society ua ki koi ngiem tuom ahi jie leh khanglaite tulai a internet tungton a online fellowship vela va tel in ama uh pawl gindan hoisa in ava pom umzel ahi.

MISSION COLUMN

(Thumpi dingte)

Amasapen in Mangpa Jesu thupieh bang a Khantanhoi puonzahna nna i Synod lieng, Local lieng, mimal leh Partnership tungtawn a i nasepnate uh jjreport bawlthei/suothei a ium ziehin lungdam thu igen masa uhi. Tambang in:

1) MANGJING MISSION FIELD (MEITEI) NASEP DAN:

Tu leh tu in Mangjing Mission Field ah siem zilna (Evangelism through Education) tungtawn in tam anuoi a ten asem uhi.

- i) Mr. Thangkhanlien, Head Master
- ii) Ms. Niangneilam, Asst. Head Mistress
- iii) Grant asem zat mi - 3

2. Evangelist N. Priyo Kumar in Mangjing area a nna asem hi.

Note: Mangjing Mission Field ah tu leh tu in Christian inn (Families) inn 8 (giet) a um ua, School naupang sawmkuo (90) vel inei ua, ahin Covid -19 natna ziehin School kaitheilou phawt uhi.

Tuaban ah, tutung Manipur Board (HSLC) result (Class X) ah i Mngjing School ua Class-IV ten na kai Mr. Bobosana Khumanthem in Manipur pumpi pawlsawm (10) examna ah thumna (3rd rank) in hing pang hi.

2. PASPATI MISSION FIELD (NEPALI) TE LAH INASEPNA UH:

1) Evangelist Bhim Prashad Ghatani in 1991 vel apat in Evangelist Teacher in nna semtou in tu in gingtha tamtah zong inei un ilawching tou zelzel uhi.

3. KARBI ANGLONG MISSION FIELD NASEPNA:

Tutung “14th Mission Conference” ah Mr. Prosona Ronghang, Karbi Anglon area a sem dingin ila uhi. Covid natna kawmkal ah zong gin umtahn asem tou zelzel hi.

4. PARTNERSHIPTUNGTON IN INDIAN EVANGELICAL FELLOWSHIP (IEM) LEH (FMPB) TE TOH ISEM UHI.

1) Indian Evangelical Mission te kung ah Partnership in tam anuoi ate i chawm uhi.

- i) Rev. Thangzalun Simte, Churachandpur area a sem ahi.
- ii) Mrs. Leishichon Shimrayte ichawm uhi.

2) Friend Missionary Prayer Fellowship tungtawn in tam anuoi a te i chawm uhi.

- i) Rev Thawngkhankap, Mobilizar Manipur
- ii) Mrs. Tingneineng Singson, Sahbganj Jharkhan

3) Local lieng a tu leh tu a Missionary chawmte:

- i) Central Church ten Evang Thara Gangte Imphal area a um ahi.
- ii) Lailam Veng Hattuum te in zong tu leh tu in Mr. Thangzamang Haokip M. Div. khu Tripura Field ah acawm uhi.
- iii) Shillong Hattuum in zong Mr. Rajman khu Motbung Charhajare area ah, achawm uhi.
- iv) Delhi Hattuum ten zong mini Pastor Sompal, Slum Ministry, Vikaspuri ah sem in a chawm uhi.

Tuaban ah, Mr. Raju Marandy, Varanasi Mission Field ma a chawm uhi.

5. MIMAL A MISSIONARY CHAWM INEITE UH:

- i) Mr. Zuonneithang of Tuibuong Hattuum in Mrs. Kampung Taba, FMPB nuoi ah Synod tungtawn in a chawm hi.
- ii) Mr. Soiminthang @ Mawmoi in zong Mr. Ginmuonthang M.Th khu Central Churchte tungtawn Tripura ah a chawm hi.
- iii) Upa Nuomkhonieng in (L) Upa Liansuanpau min in FMPB nuoi ah Mr. Thanglal Zou a chawm hi.

Reported by:

Executive Secretary
i/c M & E.

SUUN NA

(L) Upa Khamkhogin khu kim 25-12-1935 ni in Kullian khuo ah ana pieng hi. Apa min (L) Gindai ahia, Anu min (L) Chiinzavung ahi. Ama khu Kullian khuo ah hing khanglien in laizilna lam lunglut mama ahiziehin tua hun lai a, Mangasubah (5 suah) tan ana zou hi.



Kum 05-01-1062 ni in Pasian thu awi a ang kipieh in Kum 10-03-1962 ni in Rev. Vungdal in Baptistma ana tangsah hi. Tuachin Rev. Mangdal in Aji Suanngainiang toh pindan ah ana kitengsah a, tuachiin ta pasal 4 leh numei 7 anei uhi.

Tuachiin aji toh Khristian hinkhuo a hing zangtou zel ua, Pasian lam ah pan ahing la uhi. Tuachiin ama khu 54th Assembly Council Zomi Colony Hattuum ah 2008-01-20niin Moderator Thongdou in Upa Ordination ana pie hi. MELC Hattuum Kullian khuo a hinkhuo azahlai in tahsa hatlou lam manaw ahina toh Lamka lam lunggulna nei in kum 2013 in Awnchinkap khuo ah hing pem in aji atate toh a innkuon un Presbyterian Church Awnchinkap khuo ah ahing kipie uhi.

Tuachin ama khu 60th MGP Session Lailam veng Presbyterian Church ah Presbyterian Church Awnchinkap khuo a Upa hi dingin Moderator Rev. Thangboi khuongsai in Upa Re-instate ana pie hi. Tuachin aman Presbyterian Church of India Awnchinkap khuo ah gin-um tah in Pasian nna asem a kum 2020-08-19 niin a it leh a ngai mama aji atate leh a Hattuum mite nuasie in amuolliem ta hi.

(L) Upa Khamkhogin in adamlai iin Khanglai Chairman terma khat ana puo a, Tuitha area, sottah kumsom val asem a, tualeh Local Missionary Chairman kum thum ana puo hi. Aladei: Jerusalem keima innnuom dingin ki gel zouta.

Upa Khamkhogin in kum 85 leitung hinkhuo aman zou in, Date 19/08/2020 ni in a iit angai aji atate leh a Hattuum mite nuasie in aleitung hinkhuo atawldamta hi. Aman ahing nusie na tung ah tami i Khristian Tangkou tungtawn in i dapi thu igen uhi.

July 23, 2020 to September 01, 2020 tan a Tunnu Limbel panpina pete:

1. Pa Kamkhogin, Central Church	Rs.	800
2. Esther Chingneikim, Lailam Veng	Rs.	2,000
3. Donneiching, Central Church	Rs.	500
4. Upa Dongzapau, Manniang Khuo	Rs.	500
5. Tv. Khupmalsawm, (2nd Assam Regt. Arunachal), Tangpijol	Rs.	2,000
6. Upa PK Soia, Tuining	Rs.	100
7. Nu Ngailian, Lailam Veng	Rs.	3,000
8. Upa Khamsuanlian, Lailam Veng	Rs.	1,200
9. Nemthianhoi, Zomi Colony	Rs.	5,000
10. Nousuanching, Central Church	Rs.	500
11. Nh. Niangneilam, Mangjing	Rs.	1,000
12. PWF S. Muvanlai Khuo , Anntang taang	Rs.	2,500
13. PWF Teisalang, Anntang taang	Rs.	1,500
14. PWF Behiangtung, Anntang taang	Rs.	500
15. ZPC Bangaluru	Rs.	3,000
16. Siamnu, Muallum	Rs.	200
17. Pa Kamchinthang, Lailam Veng	Rs.	100
18. Sye Zamkhanthang, Awnchinkap Khuo	Rs.	200
19. Upa Ginsuankhai, Tuining	Rs.	300
20. Upa H.T Manga, Tuining	Rs.	200
21. Pi Chingboi, Tuining	Rs.	200
22. Ginzalam, Hiangtam	Rs.	1,000
23. Pi Niangpi w/o Hausuanthang, MDC	Rs.	3,000
24. Upanu Mannianching, Lailam Veng	Rs.	1,000
25. Nu Manneikim, P.Salem	Rs.	500
26. Paulam & Family, Singngat	Rs.	5,000
27. Nu P. Niangngaiching, Zomi Colony	Rs.	300
28. PWF Maukot, Gotuoi leh Anntang	Kg.	60
29. Pa Dalthang, Lailam Veng	Rs.	10,000
leh Home a um Naupang 21 ten ama uh mimal poimawna ua azah ding uh Rs. 500 chiet		
30. PWF Zoumunnuam, Anntang Kg. 60, Chini-Kg. 4, Chi-Kg. 4 leh Chapati Packet 1		
31. Nuching, Simveng-Kobi, Allu, Annzang leh Chi Kg.2		

***Petu zousie Mangpa'n ale tampi in hing guolzawl semta hen aw!
Adihlou khate Office a suhdih theizing ahi.***

PATRON MEMBER-TE

1. Upa Gouzamang	2. Pu Hav. Khamchinkhup	3. Pu Khamzalam	4. Pu Chinzasuan
5. (L) Upa Liansuanpau	6. Pu Khamchinthang	7. Pu S.Dalthang	8. Upa Kapkhanthang
9. Upa Langginmang	10. Upa S. Nangkhanlal	11. Pu S. Lamkhotang	12. Upa Dr. M. Lachinkhai
13. Upa Khamchinjam	14. (L) Upa D.K.Manlun	15. Upa Suankhanmang	16. (L) Upa Khupgou
17. Upa Chinkham	18. Upa Ngulchinkham	19. (L) Rev. V. Vungzalian	20. Rev. Retd. Kamkhosoi
21. Rev. Retd. Tualzachin	22. Rev. (Rtd.) H. Nengzatun	23. Rev. Awnkhankhup	24. Rev. Dr. Hangpi Manlun Zou
25. (L) Pu Tuanzapau	26. (L) Rev. Ginchinjam	27. (L) Rev. Khamzasuan	28. Upa T. Lamkhotawng
29. Upa Khaichinmang	30. Rev. Stephen Chinzathang	31. Pu Khupkhanmang	32. Pu Khaidohlian
33. (L) Hav. Khamzahang	34. Pi Vungzanuam	35. Pu T. Gouzadon	36. Upa Liensuonkap
37. Pi Zelkhoichin	38. Pi Hatkhanvung	39. (L) Pi Ngaihoiching	40. Pi Mankhanniang
41. Pu Goukhanmang	42. Pi Chingzalam	43. Pu S. Thianzakhai	44. Pi Kamkhanching
45. Pu Haukhanpau	46. Pu Tuallianmang	47. (L) Pu Dongkap	48. (L) Pi Chingkhanmang
49. Pi Donkhonian	50. Upa Henzakhup	51. (L) Pu Saichinpau	52. Pu Goumang
53. (L) Upa Khamkhanhang	54. Shie Laangkhanlal	55. Pu Khamkhanlun	56. Upa L. Tualkhanpau
57. Upa Jamsianmung	58. Upa Ginzadong	59. Pu Kaizathang	60. Pi Goizanuom
61. Pi Thangneivah	62. Pu Khamzathang	63. Pi Donchin	64. Upa Liankhanmang
65. Pu Hauchinlun	66. Pu T. S. Lal	67. Pi Goichin	68. Pu T. Khupchinthang
69. Upa T. Kaizalam	70. Pu Paul Henkholal	71. (L) Pu Soikham	72. Rev. P.C. Manga
73. Rev. Khamchinkhai	74. Rev. Jamlianpau	75. Rev. Chinzapau	76. Rev. Retd. Kamkhosam
77. Upa (L) Chinpu	78. Pu Zamkhanthang	79. Pu Chinglen	80. Miss Chinhaunieg
81. Upa P. K. Soia	82. Pu Goukhai	83. Pi Niangkhanmang	84. Evan. Retd. G.L. Joshya
85. Pi S. Chingkhanmang	86. (L) Pu Vumchinkhup	87. Upa Khaihenthang	88. Upa T. C. Pau
89. Upa Nengchinkap	90. (L) Upa Jamkhongam	91. Upa HT Manga	92. Mrs. Vahkhohling
93. Pu Hauliankap	94. Pi Chinnu	95. (L) Upa Ngulzakhai	96. (L) Upa T. Gougin
97. Pu Ginsuanhau	98. Upa (L) Langminthang	99. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thathang Taithul	104. Pu Kamkhankap
105. Bhim Prasad Ghatani	106. Rev. M. Kapsuanthang	107. Nu Chingneikim	108. Rev. Khupkhansuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppa	114. Rev. (L) Mangsuanthang	115. (L) Pu Lamchinhou	116. Upa Pauchinlel
117. Nu Kimneihoi	118. Upa Kamgenpau	119. Nh. Niangsuanuam	120. Nu Ngaikhanvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. Upa Lunchinthang
129. Pu P. Tongthang Zou	130. H. Nehzamang	131. Pu Thangsuankhup	132. Upa M. Kamzadon
133. Pu Jamkholian Munlao	134. Pu Sianzakhai	135. Upa Thangginsuan	136. Pu Kapminlun

LIFE MEMBER-TE

01. Upa (L) T. Khupkhenpau	02. (L) Pu M. Ginzahau	03. (L) Pu Selzapau
04. Pu L.C. Pautungnung	05. (L) Pi Khamkhanniang	06. Pi Ngaiuom
07. Upa Chinsuanthang	08. Upa Shanti Kumar	09. Pu Kamkhohau
10. (L) Pu Khamkhohau	11. Upa Khamzathang	12. Upa Chinkhanthang
13. Pu (L) Tongzathang	14. Pi Chiinneilam	15. Upa Kulthang
16. H/Sm. Upa Kaichinpau	17. Pi Niangzalam	18. Upa P. Doukholun
19. Pu Kapminlian		

Undelivered

Please return to:

The Editor

KHRIŒTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

Synod Office Telephone No. (03874) 235105

Website: zousynod.org | email: info@zousynod.org

zpcs@rediffmail.com/zousynod05@gmail.com

7a,
